



Հանրապետական մանկավարժահոգեբանական կենտրոն

«Հանրակրթական դպրոցների ուսուցիչների և ուսուցչի
օգնականների դասավանդման հմտությունների զարգացման
ապահովում» ծրագիր

ՀԵՏԱԶՈՏԱԿԱՆ ԱՇԽԱՏԱՆՔ

Դպրոց՝ Ն. Գետաշենի Ա. Եղիազարյանի անվան թիվ 2 միջն. դպրոց

Թեմա՝ Գնահատում, գնահատման տեսակները, գնահատման

գործիքները դասավանդման շրջանակներում

Վերապատրաստող, մենթոր՝ Մարիամ Սեդրակյան

Ուսուցիչ՝ Նարինե Գրիգորյան

2023թ.

ԲՈՎԱՆԴԱԿՈՒԹՅՈՒՆ

Ներածություն-----	3
Գլուխ 1. Գնահատում, գնահատման նպատակները -----	4
Գլուխ 2. Գնահատման ձևերն ու առանձնահատկությունները -----	10
Գլուխ 3. Գնահատման գործիքների կիրառումը դասավանդման շրջանակներում -----	14
Եզրակացություն -----	16
Օգտագործված գրականության ցանկ -----	17

ՆԵՐԱԾՈՒԹՅՈՒՆ

Ժամանակակից հանրակրթական դպրոցում առկա են բազմաթիվ խնդիրներ: Դրանցից է ուսումնական գործընթացում գնահատման դերն ու առանձնահատկությունը: Գնահատման խնդիրը ժամանակակից դպրոցի ամենաբարդ խնդիրներից մեկն է: Սովորողների կարծիքով իրենց իրավունքների ոտնահարման դեպքերը ամենից հաճախ կապվում են չհիմնավորված գնահատման հետ: Երբեմն սովորողները դժգոհում են, որ գնահատման չափանիշները հստակ չեն, նախապես հայտնի չեն լիոնում իրենց, ահա թե ինչու անհրաժեշտ է, որ հստակ սահմանվեն գնահատման չափանիշները: Սովորողի ձեռքբերումների վրա հիմնված գնահատումը կազմված է ընդարձակ պատասխան պահանջող մի շարք առաջադրանքներից: Հանրակրթության մեջ կա գնահատման միասնական համակարգ: Միավորային գնահատումը ամբողջությամբ չի բացահայտում աշակերտի ձեռք բերած գիտելիքը և դժվար է ասել՝ ճիշտ է միավորային գնահատման սկզբունքը: Միավորները չեն կարող ամբողջությամբ վեր հանել այն ամբողջ տեղեկատվությունը, որն ունի երեխան: Եթե մենք ուզում ենք արդյունավետ, խելամիտ գնահատում մշակել, որը կնպաստի իրազեկված, շրջահայաց ու լրջմիտ քաղաքացիներ դաստիարակելու խնդրին, ապա պետք է կիրառենք գնահատման տարբեր ձևեր:

ԳԼՈՒԽ 1

ԳՆԱՀԱՏՈՒՄ, ԳՆԱՀԱՏՄԱՆ ՆՊԱՏԱԿՆԵՐԸ

Գնահատումը ուսումնառության ակտիվ գործընթաց է: Ուսումնական գործընթացում սովորողի ձեռքբերումներն ուսուցիչն ամրագրում է գնահատման գործընթացով: Գնահատման հիմնական նպատակը սովորողների գիտելիքների, կարողությունների և հմտությունների յուրացման և տիրապետման աստիճանի, նրանց անձնային որակների ստուգումն է, ինչպես նաև ուսման որակի վերահսկումը: Գնահատումը տեղեկատվություն ստանալու, հավաքելու, վերլուծելու և դրա հիման վրա հանրակրթության բովանդակային և կազմակերպչական աշխատանքների արդյունքներն ի մի բերելու և վրահսկելու գործընթաց է: Գնահատվում են հանրակրթության արդյունքները: Կրթական գնահատումը ուսումնական գործընթացի արդյունավետության և ուսուցման արդյունքների բացահայտման միջոց է, այն օգնում է պարզել յուրաքանչյուր սովորողի գիտելիքների, կարողությունների, հմտությունների մակարդակը, նրանց արժեքային համակարգը: Գնահատումը առավել ընդհանուր բնորոշմամբ կարող ենք ձևակերպել, որ այն պարբերական գործընթաց է, որը որոշում է ձեռք բերած գիտելիքների ու կարողությունների արժեքներն ու նշանակությունը:

Գնահատման մեջ երկու կարևոր սկզբունք կա. այն պետք է հիմնավորվի առաջադրված նպատակներով և ցույց տա դրանց հաջողության աստիճանը: Գնահատումը պետք է ձգտի առավելագույն օբյեկտիվության:

Կարելի է ասել կրթության մեջ գնահատման գործընթացը նրա բոլոր մասնակիցների (ուսուցիչների և աշակերտների) բաց համաձայնագիրն է: Գնահատումը որոակական (մակարդակային) և քանակական (միավորներով) դրսևորումներ ունի: Գնահատվում են ինչպես գործընթացները, այնպես էլ այդ գործընթացների արդյունքները: Գնահատման կարևոր խնդիրներից մեկը նրա ինքնանպատակ չլինելն է: Գնահատականը պետք է նպատակաուղղված լինի սովորողի ինչպես կրթական, այնպես էլ անհատական կարողությունների զարգացմանը:

Աշակերտին գնահատելիս պետք է հիմնվել անհատական համեմատական կողմնորոշման վրա՝ աշակերտի առաջընթացը, զարգացման առանձնահատկությունները, ուսումնական գործընթացի յուրահատկությունները, համեմատել ոչ թե մյուս աշակերտների, այլ հենց իրենց հետ:

Գնահատելիս անհրաժեշտ է առաջնորդվել լավատեսական մոտեցմամբ՝ հաշվի առնելով յուրաքանչյուր աշակերտից ակնկալվող ուսումնական հաջողությունները և գնահատել նույնիսկ ամենափոքր դրական առաջընթացը: Գնահատականը պետք է օգտագործել որպես հետադարձ կապ, որն անհրաժեշտ է աշակերտի աշխատանքի արդյունավետությունը գնահատելու, այլ ոչ թե նրան խիստ վերահսկողության տակ առնելու կամ ճնշելու համար:

Պետք է գնահատել ոչ միայն սովորողի վերջնական արդյունքը, այլ ուսումնական գործընթացում սովորողների աշխատանքը, որը կարելի է կազմակերպել բովանդակային ծավալուն գնահատականի օգտագործմամբ:

Սովորողներին անհրաժեշտ է մասնակից դարձնել գնահատման գործընթացին, նրանց սովորեցնել գնահատել ինչպես սեփական, այնպես էլ ընկերների աշխատանքը, համատեղ մշակել գնահատման չափանիշներ, աշակերտների մեջ ձևավորել ինքնավերահսկման կարողություններ:

Գնահատումը պետք է մոտ լինի իրական կյանքին, այն պետք է հիմնվի առօրյա կյանքից վերցված կամ այդպիսի ենթատեքստ ունեցող իրադրությունների վրա: Գնահատման ժամանակ պետք է օգտագործվեն այլընտրանքային և համակցված եղանակներ: Սովորողը պետք է իմանա, թե ինչու և ինչ չափանիշներով է գնահատվում:

Գնահատման գործընթացը կենտրոնական տեղ է զբաղեցնում ՀՊԶ նպատակներում՝ սովորողների գործունեությանը նպատակաուղղված և արդյունավետ կազմակերպելու ուսուցման հինգ հիմնական տարրերին համապատասխան.

- գիտելիքների ձեռքբերում,
- հասկացությունների իմաստավում,
- կարողությունների զարգացում,

- վերաբերմունքի, արժեքների ձևավորում,
- գործողությունների (արարքների ձեռնարկում):

Գնահատումը համագործակցային և տեղեկատվական գործընթաց է, որն ընդգրկում է ողջ դպրոցական համայնքը՝ սովորողներ, ընտանիքներ, ուսուցիչներ:

Սովորողների ուսումնառությունը կազմակերպվում է ուսումնական գործընթացի պլանավորման և կատարելագործման միջոցով՝ ուղղված նրանց անհատական կամ խմբի պահանջներին:

Գնահատումը միտված է յուրաքանչյուր սովորողի ուսումնական գործունեության խթանմանը, ուսուցման և ուսումնառության վերահսկմանը, բարելավմանը և շարունակական զարգացմանը: Գնահատման գործընթացի հիմքում ընկած են հավաստիության, հուսալիության, օբյեկտիվության, մատչելիության, արդարության և թափանցիկության սկզբունքները:

Ըստ նպատակի՝ կիրառվում է սովորողների գնահատման երեք տեսակ.

1. հայտորոշիչ գնահատում,
2. ձևավորող գնահատում,
3. ամփոփիչ (միավորային) գնահատում:

1.1 Հայտորոշիչ գնահատում

Հայտորոշիչ գնահատման նպատակն է՝ բացահայտել սովորողի նախնական գիտելիքները, հմտությունները, վերաբերմունքն ու արժեքները ուսումնական գործընթացի որևէ փուլի՝ ուսումնական տարվա, կիսամյակի, առարկայի, դասընթացի, նոր թեմայի ուսումնասիրման մեկնարկից առաջ:

Հայտորոշիչ գնահատումը հնարավորություն է տալիս պլանավորելու ուսուցման և ուսումնառության գործընթացը, ինչպես նաև ընտրելու ուսուցման կազմակերպման արդյունավետ ձևեր, միջոցներ և մեթոդներ: Հայտորոշիչ գնահատումը իրականացվում է տարբեր ձևերով՝ կախված ուսումնասիրվող առարկայի, թեմայի և սովորողի կամ ուսումնական խմբի տարիքային ու անհատական առանձնահատկություններից:

Հայտորոշիչ գնահատման ձևն ընտրում է ուսուցիչը: Հայտորոշիչ գնահատման համար կարող են օգտագործվել հետևյալ ձևերը՝ թեստային կամ գրավոր այլ աշխատանք, բանավոր հարցում, բաց հարցերով քննարկում:

1.2 Ձևավորող գնահատում

Ձևավորող գնահատումը ուսուցչին հնարավորություն է տալիս պարզելու յուրաքանչյուր սովորողի և ամբողջ դասարանի ձեռքբերումները, դժվարությունները:

Ձևավորող գնահատումը ապահովում է հետադարձ կապ ուսումնական գործընթացում, որի արդյունքների հիման վրա իրականացվում են աշխատանքներ յուրաքանչյուր սովորողի և ամբողջ դասարանի առաջադիմության բարելավման ուղղությամբ: Ձևավորող գնահատումը կարող է իրականացվել թեստերի, բանավոր հարցումների, գործնական աշխատանքների, տնային աշխատանքների միջոցով: Ձևավորող գնահատման ժամանակ օգտագործվում են սովորողի առաջընթացը բնութագրող որակավորումներ, վերլուծություններ և մեկնաբանություններ:

Ձևավորող գնահատման բաղադրիչներն են.

- սովորողների գործուն մասնակցությունը սեփական ուսումնառությանը,
- ինքնագնահատում և փոխադարձ գնահատում,
- սովորողների ուսումնառության գործընթացի շտկում,
- սովորողների մոտիվացիայի ապահովում,
- հետադարձ կապի ապահովում:

Ձևավորող գնահատումը իրականացվում է ուսուցման ողջ ընթացքում: Այս գնահատմանը մասնակցում են, թե՛ ուսուցիչը, թե՛ սովորողը: Գնահատման արդյունքում տրվում է սովորողի բնութագիրը: Ձևավորման գնահատման միջոցով բացահայտվում է սովորողի ուժեղ և թույլ կողմերը, բարելավվում է ուսուցման և ուսումնառության գործընթացը: Ձևավորող գնահատումը իրականացվում է տարբեր ձևավորման գնահատման գործիքներով: Ձևավորող գնահատման մեջ ակտիվ դերակատար է սովորողը, նա պետք է ակտիվ դեր ստանձնի իր կրթության գործում: Ձևավորող գնահատման մեջ սովորողը նպատակային սովորում է սովորել: Ձևավորող գնահատման տարբեր գործիքների կիրառմամբ խրախուսվում է սովորողի

ներգրավումը ուսումնական գործընթացում: Այս գնահատման միջոցով ուսուցիչը և սովորողը միասին պարզում են, թե որտեղ են իրենք գտնվում և ինչ պետք է անեն նպատակին հասնելու համար: Ձևավորող գնահատումը ունի նաև մեծ առավելություն այն առումով, որ ունի բազում կրթական նոր մեթոդներ ու հնարներ: Դրանք են՝ ջերմաչափումը, հարցադարանը, գիտելիքների բուրգը, արտաքին և ներքին շրջաններ, չորս անկյուններ, ելքի քարտեր: Ձևավորող գնահատումը իրականացնելիս անհրաժեշտ է վեր հանել սովորողների կարիքները.

- Յուրացրե՞լ են թեման, թե՞ ոչ:
- Կարելի՞ է արդյոք անցնել մյուս բաժինն ուսումնասիրելուն:
- Ո՞վ ունի լրացուցիչ օգնության կարիք:
- Ի՞նչը պետք է փոխել կամ վերանայել դասի պլանավորման և դասավանդման մեթոդիկայում:

Արդյունավետ ուսումնառություն ապահովելու համար կարևոր է դասի ճիշտ սկիզբ և ավարտ ստեղծելը: Այն իրականացնում ենք մուտքի և ելքի քարտերով:

Մուտքի քարտի ժամանակ ձևակերպում ենք կարճ հարցեր նախորդ թեմայի վերաբերյալ, ելքի քարտի ժամանակ օգտագործում ենք կարճ հարցադրումներ նոր թեմայի վերաբերյալ: Գնահատման կիրառվող ձևերը պետք է հնարավորություն ընձեռեն լիարժեք չափելու սովորողի ձեռք բերած գիտելիքները, կարողություններն ու հմտությունները: Դասավանդման գործընթացում կիրառելով ձևավորող գնահատման բազմազան գործիքներ՝ կարելի է բացահայտել սովորողի ամբողջ ներուժը:

1.3 Միավորային գնահատում

Միավորային գնահատումը իրականացվում է ուսուցման ավարտին: Ամփոփիչ գնահատման արդյունքների հիման վրա ձևավորվում է կիսամյակային, իսկ կիսամյակային գնահատման արդյունքների հիման վրա ձևավորվում է տարեկան ամփոփիչ գնահատականը:

Միավորային գնահատման դեպքում կիրառվում է սովորողների ուսումնառության արդյունքների գնահատման տասը միավորային սանդղակ: Միավորային

գնահատումը ձևավորվում է բանավոր հարցման արդյունքում, գործնական աշխատանքների արդյունքում և թեմատիկ գրավոր աշխատանքների արդյունքում:

ԳԼՈՒԽ 2

ԳՆԱՀԱՏՄԱՆ ՁԵՎԵՐՆ ՈՒ ԱՌԱՆՁՆԱՀԱՏԿՈՒԹՅՈՒՆՆԵՐԸ

Գնահատումը բազմաբնույթ հասկացություն է, որը սահմանվում է որպես տեղեկատվության ձեռքբերման գործընթաց, որն օգտագործվում է սովորողների ուսումնառության առարկայական ծրագրերի և պլանների ինչպես նաև կրթական քաղաքականության մասին որոշումներ կայացնելու համար: Գնահատումը որպես գործընթաց դասարանում նշանակում է նաև քանակական և որակական տվյալների նպատակային հավաքում: Ուսուցիչների համար գնահատման նպատակը սովորողների մասին որոշում կայացնելն է թե՛ որպես խումբ, թե՛ որպես անհատ: Դասարանում գնահատումը ենթադրում է սովորողների կողմից առաջադրանքների կատարումը զանազան միջավայրերում և համատեքստերում: Սովորողները կարող են իմանալ, թե իրենց ինչի համար են գնահատում, կամ գնահատումը կարող է լինել դասավանդման հետ միաձույլ՝ աշակերտների կողմից ընկալվելով որպես ընդամենը իրենց սովորածի մեջ գործնականում վարժվելու հնարավորություն: Գնահատման մասին խոսելիս պետք է սկսել ուսումնական նպատակներից: Ուսումնական նպատակների մասին խոսելիս մանկավարժները հաճախ մեջ են բերում Մենեկայի հետևյալ միտքը. «Եթե մարդ չգիտի, թե որ նավահանգիստն է նավարկում, ապա նրա համար ոչ մի քամի էլ նպաստավոր չէ»:

Ուսումնական նպատակները հիմք են ապահովում հակասությունների լուծման համար: Հակասություններն աշակերտների միջև, ինչպես նաև սովորողների և դասավանդողների միջև լուծվում են նաև այն հիմունքով, թե սովորողներն ու ուսուցիչներն ինչի են ուզում հասնել: Ուսումնական նպատակները գնահատման անհրաժեշտ պայման են: Առանց հասկանալու, թե ինչն է տվյալ աշխատանքի նպատակը, ոչ մի գնահատում չի կարող իրականացվել: Գնահատումը սկսվում է նպատակների սահմանումով, շարունակվում է առաջադիմության ստուգումներով և ավարտվում է այն բանի արժևորումով, թե ինչ չափով են նպատակները իրականացվել: Գնահատման ձևերից կարևոր է ուսուցողական գնահատումը, որը

Ինչպես արդյունավետ է աշակերտների առաջադիմությունը բարձրացնելու առումով: Ուսուցողական գնահատումը բարելավում է աշակերտների արդյունքների համաչափությունը: Ուսուցողական գնահատման միջոցով ձևավորվում են «սովորել սովորելու» հմտությունները: Այն նաև զարգացնում է աշակերտի՝ համադասարանցիներին և ինքն իրեն գնահատելու հմտությունները: Գնահատման գործընթացի նպատակն է՝ գնահատել այն, ինչ ուսուցանվել է:

Գնահատման սկզբունքներից է օբյեկտիվ գնահատումը: Օբյեկտիվ գնահատումը կախված չէ գնահատողի անձնական մտածողությունից կամ վերաբերունքից, օրինակ պատասխանի ընտրությամբ առաջադրանքներ (թեստեր): Գնահատումը սուբյեկտիվ է, երբ այն կախված է գնահատողի անձնական դատողություններից, սկզբունքներից ու վերաբերմունքից: Սուբյեկտիվ են համարվում բանավոր հարցումները, պատասխանի շարադրանքով առաջադրանքները, կամ որոշ գործնական աշխատանքներ:

Քանի որ գնահատման գործիքները բազմազան են, ցանկալի արդյունքի հասնելու համար կարելի է կիրառել ձևավորող գնահատման ոչ ժամանակատար ամենօրյա գործածության համապատասխան գաղափարներ: Օրինակ կարևոր է դասի առաջին և վերջին հինգ րոպեները տրամաադրել կարճ հարցադրումների համար: Եթե էլեկտրոնային ռեսուրսներ կան դասարանում՝ հարցադրումները այդ հարթակում կկիրառենք, այլապես սովորողները փոքրիկ թերթիկների վրա կգրեն յուրացրած և ոչ այնքան լավ յուրացրած հարցերը, գաղափարները և կզգեն երկու տարբերակված արկղիկների մեջ: Այնուհետև դրանք ընթերցելով ուսուցիչը կհասկանա իր հաջորդ քայլերը: Դասի ավարտին սովորողները կարող են նշել երեք բան, որ յուրացրել են, երկու բան, որոնց մասին կուզենային ավելին իմանալ, մեկ բան, որ չեն հասկացել: Որի քննարկման արդյունքում կպարզաբանվեն բոլոր հարցերը:

Քանի որ ուսումնառության արդյունքը ապահովվում է ամփոփիչ գնահատմամբ, որը սովորողի ձեռքբերումների մակարդակը թվանշանով արտահայտելն է, ապա միավորային գնահատումը պետք է լինի հնարավորինս օբյեկտիվ: Միավորային գնահատումը պետք է հնարավորություն տա ստուգելու ցանկացած սովորողի իրական

կարողությունները: Միավորային գնահատման համար մենք դասարանում կիրառում ենք.

- Բանավոր հարցում
- Գործնական աշխատանք
- Թեմատիկ աշխատանք

Ստուգման տեսակների բազմազանությունը նպատակ ունի տարբեր տեսանկյուններից չափել սովորողների գիտելիքները, կարողություններն ու հմտությունները, որպեսզի արդյունքում ունենանք առավել հավաստի գնահատական:

Սովորողի ուսումնառության արդյունքների միավորային գնահատման ենթակա բանավոր, գրավոր և գործնական աշխատանքների ստուգումից ստացված արդյունքների միավորների բնութագրիչները սահմանված են ՀՊԶ պահանջներին համապատասխան:

2.2 Հայտորոշիչ, ձևավորող և միավորային գնահատում իրականացվում է նաև ԿԱՊԿ սովորողների համար: ԿԱՊԿ սովորողների կրթության իրավունքի իրացման գործընթացը հիմնվում է կրթության մատչելիության, հավասար մասնակցության հնարավորության և որակի ապահովման սկզբունքների վրա:

Ներառական կրթությունը ենթադրում է բոլոր՝ այդ թվում ԿԱՊԿ սովորողների կարողությունների լիարժեք բացահայտմանը, արդյունավետ գնահատմանը: Քանի որ ԿԱՊԿ սովորողները ներառվում են ուսումնական գործընթացում՝ նրանց գնահատումը ևս պետք է իրականացվի առանց խտրականության՝ օգտագործելով միավորային գնահատման համապատասխան տեսակները (կախված ներառման կարիքից) և գնահատման տասը միավորային սանդղակը: Հաշվի առնելով ԿԱՊԿ սովորողների առանձնահատկությունները, ուսումնական ձեռքբերումների ստուգման և գնահատման միջոցները հարմարեցվում են նրանց ընկալման և մտավոր գործունեության կարողունակություններին: Առաջադրանքները ԿԱՊԿ յուրաքանչյուր սովորողի համար կարելի է կազմել՝ դրանք հարմարեցնելով այդ սովորողների կարիքներին՝ ըստ անհրաժեշտության ապահովելով լրացուցիչ ժամանակ, հանգստանալու ընդմիջումներ: Սովորողը կարող է իր պատասխանը գրի առնել

համակարգչի կամ այլ տեխնիկական միջոցով (հնարավորության դեպքում):
Գնահատման և գրանցման համար կիրառելի են ստուգաթերթեր, թեստեր, որոնք
պարունակում են չափորոշչային նվազագույն պահանջների տրոհված մասերին
համապատասխանող առաջադրանքներ:

Գնահատման գործընթացը պետք է պայմաններ ընձեռի սովորողներին իրենց
գիտելիքների և ներուժի արտահայտման համար: Կարևոր է, որ գնահատումն
իրականացվի սովորողի համար անմիջական, հանգիստ և բնական պայմաններում:
Այն պետք է հնարավորություն ընձեռի սովորողի նկատմամբ արդար վերաբերմունքի
դրսևորման համար, հիմնված պետք է լինի հավասարության սկզբունքի և օբյեկտիվ
գնահատման հիմքի վրա: ԿԱՊԿ սովորողի միավորային գնահատման կիրառման
քանակները կախված տվյալ սովորողի կարիքի առանձնահատկություններից, կարելի
է հասցնել թույլատրելի նվազագույն քանակներին:

ԳԼՈՒԽ 3

ԳՆԱՀԱՏՄԱՆ ԳՈՐԾԻՔՆԵՐԻ ԿԻՐԱՌՈՒՄԸ ԴԱՍԱՎԱՆԴՄԱՆ ՇՐՋԱՆԱԿՆԵՐՈՒՄ

Հաշվի առնելով սովորողների հոգեբանական, մարդկային, տարիքային
առանձնահատկությունները, դասավանդման գործընթացում ձեռքբերած փորձը
հասկանում եմ, որքան կարևոր է ճիշտ և օբյեկտիվ գնահատումը: Հետազոտության
նպատակն է յուրաքանչյուր դասի ժամանակ իրականացնել գիտելիքների,
հմտությունների, կարողությունների ձեռքբերման նպատակները՝ թեմայի
շրջանակներում և օբյեկտիվ ու չափելի գնահատման շնորհիվ խրախուսել ու ոգևորել
սովորողներին: Սովորողները ուսուցչի բանավոր հարցադրումների, գրավոր
առաջադրանքների և գործնական աշխատանքների արդյունքում կկարողանան
տեսնել իրենց առաջընթացը դասընթացում՝ հայոց լեզվի և գրականության դասերին:
Ելնելով ամենօրյա ուսումնական գործընթացից կարող ենք ասել, որ
գնահատումը անխուսափելիորեն ազդում է ուսումնական գործընթացի վրա՝ թե՛
դրական, թե՛ բացասական առումներով: Ուստի ներկայացվող նյութը դասավանդման
ընթացքում պետք է ծառայի իր նպատակին և գնահատումը միայն պետք է նպաստի
գիտելիքների ձեռքբերմանը: Թեմայի գերխնդիրներից է ճիշտ օգտագործել և՛
հայտորոշիչ, և՛ ձևավորող, և՛ միավորային գնահատման ձևերը աշակերտի մեջ

արժեհամակարգի ձևավորման, ուսումնական մակարդակի բարձրացման, միջանձնային հարաբերությունների, աշակերտի անհատականությունը պահելու համար: Հետազոտության մեթոդները ցույց են տվել, որ գնահատման լավագույն ձևերից են ինքնագնահատումը, փոխադարձ գնահատումը, որոնք հնարավորություն են տալիս աշակերտներին ճիշտ բացահայտելու իրենց գիտելիքի չափը, ընդունելու համադասարանցիների գնահատումները: Երբ ուսուցիչը տվյալ աշակերտին գնահատելուց առաջ դասարանում հարցնում է, թե ինչ բացթողումներ արեց աշակերտը, ո՞ր հարցադրմանը չանդրադարձավ, աշակերտը հասկանում է ինչքանով է ինքը նյութը յուրացրել և ինչու արժանացավ տվյալ գնահատականին:

Հաճախ իմ դասերին օգտագործում եմ փոխադարձ գնահատման ձևը: Դասարանը բաժանում եմ երկու խմբի և հանձնարարում եմ որևէ առաջադրանք, այնուհետև մեկ խումբը ստուգում է մյուս խմբի առաջադրանքի արդյունքը և գնահատում: Ասեմ, որ աշակերտները շատ ազնիվ և օբյեկտիվ են գնահատման հարցում: Հայոց լեզվի դասերին հաճախ եմ ուսուցողական փոքրիկ թելադրություններ տալիս և մեկ սովորողը ստուգում է մյուս սովորողի գրավորը: Այս մեթոդը նպաստում է նաև ուրիշի սխալը գտնել կարողանալուն: Նպաստում է, որ տվյալ աշակերտը հասկանա ինքը ինչքան գիտի, որ կարողանա ճիշտ ստուգել դասընկերոջ աշխատանքը: Եվ կաշխատի լրացնել իր չիմացածը՝ հաջորդ անգամ ավելի ճիշտ աշխատելու համար: Դասավանդման որոշ մեթոդներ նույնպես նպաստում են աշակերտների ուսումնառության և մոտիվացիայի բարձրացմանը: Օրինակ երբեմն կիրառում եմ մեկ աշակերտի ինձ հետ դաս վարելու մեթոդը, որտեղ աշակերտը հստակ պատկերացնում է առաջադրանքը, գնահատման սանդղակը և կարողանում է ըստ այդմ ռեալ գնահատել համադասարանցիներին: Նման դասերից հետո աշակերտները ձգտում են առավել լավ յուրացնել նյութը և կարևորել ոչ թե միավորային գնահատականը, այլ գիտելիքները:

ԵԶՐԱԿԱՑՈՒԹՅՈՒՆ

Հետազոտական աշխատանքի վերլուծության արդյունքում գալիս ենք այն եզրակացության, որ ճիշտ գնահատումը, յուրաքանչյուր աշակերտին անհատական մոտեցումը նպաստում են, որ աշակերտը ոգևորվի և լրացնի գիտելիքների պաշարը: Որ ուսուցիչը գնահատականով պետք է խրախուսի աշակերտին և ստիպի ձգտել առավելագույնին: Որ գնահատումը ոչ թե պատժի միջոց լինի, այլ խրախուսման: Աշակերտը պետք է հասկանա, որ գնահատականը արտահայտում է իր գիտելիքների, կարողությունների, հմտությունների մակարդակը և վստահի ուսուցչին:

ՕԳՏԱԳՈՐԾՎԱԾ ԳՐԱԿԱՆՈՒԹՅԱՆ ՑԱՆԿ

1. ՀՀ ԿԳՆ Կրթության ազգային ինստիտուտ, Մանկավարժություն, 2009թ.:
2. ՀՀ ԿԳՆ Կրթության ազգային ինստիտուտ, Մարդ և հասարակություն, 2009թ.:
3. ԿԶՆԱԿ հիմնադրամ, պաշարների շտեմարան: